

## 10. Voeballe in de jørre fieftig

Nou Hadje van Tun nie mèr de Kieveloeëtegezit duu - wa tje övveregens aaltidj goe gedao hé - woor ik di jaor gevraagd um wa te sjrievè dör de nééj ginnerasie riddekteurs èn wal dör Joep Rooijackers òf ók wal Joep van Poost Pietje.

Van hèm huurde ik dèh Nillis Lute, ónze Prins, éne goeje voeballer is geweest. Hij hé zuuventien jaor in 't uurste van RKMSV gespuld. Hij moet ók óp de nómmnasie hébbe gestao bij VVV. Mèr dör brook ie nie dör umdèh tje te kléénj blif. Dòrnao isjje dörgesjote wies éne mééter niggentig. Bij VVV moette ze dör tòch latter spitj van hébbe gekrigge, want Nillis óntpópte zich bij MSV as éne butjegewone goeje pingelaar èn afkapper die érre sjòn wilde voeballe as mi te beuk derin.

Di broocht me óp de gedachte um min verhaal di jaor es te hawe övver 't voebal in Méél in de jørre fieftig. In 1950 zaat ik in de zisde klas van de léggere sjool. As jónges din we óp de spulplats van de jóngessjool, de vruuggere H. Hartsjool, 't liefst voeballe. Sóms waar der 'n tidje dè we din sléégere òf kéjsjeute mèr nie te laang. Dan woor der wér gevoebald.

De spulplats waar verdééld in 'n paar voebalvèlde. 'n Vervéélend ding waar as de bal dör de pinne òf 't hékwèèrek ging. Dan kwaam de bal bij méster Jochems in de hòf èn dan ware ge nòg nie jèùreg as ge bloemme òf struuk kepótmakte. Of de bal kwaam èn de andere kant bij de familie Janssen óp de stoep òf in de buurt van 't kót.

Mer die pinne èn de noordkant van de spulplats hé vur 't Méélse voebal allieën mèr vurdéle gehad. Want dèh ter utj de familie Janssen zòn goej voeballers gekómme zin, moet z'n rééje hébbe gehad in dizze tidj. Pietje, de lattere flitsende linksbutje van MSV Ieën mi zin magistrale veurzétte vur de gool, stóng die bèllekes bij hem èn husj óp te waachte èn sjoot die loepzuver dör de pinne terug óp de spulplats. En Harrie, de lattere spèktakuléere kieper van MSV Ieën, dook toen al bij zin woonhusj klèmvaast nòr die dörgesjote bèllekes van de zisde klas.

Nee, voeballe lieëre ge nie in die kapitale spòrtarenaas van nou mi trééners die miljoenne moette kooste, nee, dèh lieërde ge achter de pinne van de jóngessjool van Méél. Wa hébbe wij, min bruurs Jacques, Jo èn ik, nie dik gevoebald tusse de jóngessjool èn de Boerrebónd èn tusse de sjool èn Wiesse Koob (Verschaeren) mitte jónges van Janssen, Van Rijt, Verschaeren, Gielen, Verbaal èn andere. De ieën pertééj waar Klein Maar Dapper (KMD) èn de andere waar De Jonge Sporters (DJS). Hier hébbe we hél wa klump èn sjoen verslete, wa se tusj wér èrg vónge want 't gèld grèùjde toen nie óp de rug.

Wér terug nòr de spulplats. Umdèh die vèlde pal nééve mekaar lage, waar 't zeker smiddes éne wirwar van voeballende joong. Dik klatste ge mi òwwe kóp tege éne andere óp. Of ge kreeg éne kéejharde bal in òw gezeecht. Ge spulde òf mi òw eige klas òf ge spulde as klas tegen 'n andere klas. As ge mi òw eige klas spulde, mooste ge pertéje make. Dèh gebeurde dör "af te trééje". De tweeë beeste speulers - dèh waar 'n óngesjrivve wét wie dèh ware - begooste tegeliek mi aftrééje. Begónne woor mi ganse sjoen òf klump nòr mekaar hin. Liepe ge bijnao tege mekaar óp, dan begooste ge mi halve sjoen òf klump. Wie 't leest de punt van de sjoen òf klómp dertusse krig, móg beginne mi kieze. Die koos dan de twédde beeste èn dan móg de andere kieze. Zò ging dèh van de beeste wies de slèèchtste voëballers. 't Waar 'n kéejhaarde selèksie. Die 't uurst gekózze wore òf 't leest, ware dik dezèlfde.

Spèlregels ware der wal mèr nie veul. Dréj kòrners waar penantie. Iemmes begoos te roepe "uurste penantie" èn dan kakte andere "twédde penantie", "dréjde penantie" èn zò witjer. Die 't uurst geroepe haa, móg de uurste penantie neme. 'n Bovelat waar der nie. Of 'n bal zaat, waar dik moeilijk te beweeze. De óngesjrivve regel waar " de kiepper moost de bal ènkénne èn dan zaatje". Dizze dinkbildige lat bove de kiepper waar netuurlek dik ènlééjing vur reuzjie.

Echt spannend woor dèh voëballe óp de spulplats as klasse tege mekaar ginge speule. Vural as de vijfde tege de zisde spulde. Ik wit nòg goe dèh ter 'n dél speulers van de klas dan vruug óp sjool ware. De middigpauze waar van kwart vur twèèlf wies half tweeë. Um half ieën ware de uurste wér óp sjool terug.

Ik wónde twénjtjig sekónde loeëpe van de sjool mèr ik waar óp de spulplats zò gauw as ik móg van tusj èn dèh waar zòwa tien övver half ieën. En dan hoefde ge nie mèr te dinke dèh ge de "uurste penantie" had. Mesjiens haa ge dan nòg den "twédde" òf "den dréjde". Bij dees klassewèdstrijde hébbe veul speulers van 't lattere MSV Ieën de basis geli vur ur voëbalkariéere.

Vur mij blijft dèh voëballe óp de spulplats van de Aaw Jóngessjool wa wòrèn ik ónvergéételeke herinneringe héb. En nou héb ik 't nòg nie éns gehad övver 't voëballe óp 't Melaniatreintje òf 't voëballe in 't uurste òf dréjde van MSV. Dòr héb ik ók nòg sjòn herinneringe èn. Mer 't zou nou te witj vure um dòróp in te gao. Dèh is wa vur 't vòlgend jaor mesjiens. Me dunkt dèh Nillis, ónze Prins, genóg Méélse voëbalgesjieddenis vursesjóteld hé gekrigge. En hij moet nie allieën lééze mi de Vastelaovesdaag mèr ók duchtig èn um gao in di nééj millènnium!

*Herman van de méster*